

**Tentamen medicum inaugurale, rei medicae vicissitudines summatim
perstringens / [John Fletcher].**

Contributors

Fletcher, John, 1792-1836.

Publication/Creation

Edinburgh : J. Ballantyne, 1816.

Persistent URL

<https://wellcomecollection.org/works/ajkqpwp6>

License and attribution

This work has been identified as being free of known restrictions under copyright law, including all related and neighbouring rights and is being made available under the Creative Commons, Public Domain Mark.

You can copy, modify, distribute and perform the work, even for commercial purposes, without asking permission.



Wellcome Collection
183 Euston Road
London NW1 2BE UK
T +44 (0)20 7611 8722
E library@wellcomecollection.org
<https://wellcomecollection.org>

12

TENTAMEN MEDICUM
INAUGURALE,
REI MEDICÆ VICISSITUDINES
SUMMATIM PERSTRINGENS;

QUOD

ANNUENTE SUMMO NUMINE,
EX AUCTORITATE REVERENDI ADMODUM VIRI,
D. GEORGII BAIRD, SS. T. P.
ACADEMIÆ EDINBURGENÆ PRÆFECTI;

NECNON

AMPLISSIMI SENATUS ACADEMICI CONSENSU, ET
NOBILISSIMÆ FACULTATIS MEDICÆ DECRETO ;

Pro Gradu Doctoris,

SUMMISQUE IN MEDICINA HONORIBUS AC PRIVILEGIIS,
RITE ET LEGITIME CONSEQUENDIS ;

ERUDITORUM EXAMINI SUBJICIT

JOANNES FLETCHER,

ANGLUS

Cal. Aug. horâ locoque solitis.

EDINBURGI :

EXCUDEBANT JAC. BALLANTYNE ET SOCIJ.

MDCCCXVI.

TENTAMEN MEDICUM

IN UNGARIS

REI MEDICAE VICISSITUDINES

SUMMATIM PERSTRINGENS

TENTAMEN MEDICUM

ANNO 1800

IN ACADEMIA REVERENDI ADMODUM VIRI

DOCTORIS GEORGI BALSZ T. P.

ACADEMIAE ERINBURGENSIS PRÆSENTAT

PRO DOCTORIS GRADU

1800

ANALYSIS SENECTUS ACADEMICI CONSENSU ET

NOBILISSIMAE FACULTATIS MEDICÆ DECRETIS

192222

Pro Class Doctoris



TENTAMEN MEDICUM
INAUGURALE,
REI MEDICÆ VICISSITUDINES

SUMMATIM PERSTRINGENS.

AUCTORE JOANNE FLETCHER.

MEDICINA ars est perhibenda cui corpus humanum materia subest reficienda, remedia vero arma quibus est elaborandum. Cæteris autem cunctis artibus, ut quisque rei instaurandæ probe calleat structuram et dotes prius necesse est quam aggrediatur, deinde ut usus instrumentorum sit solers; quod perinde et in medicina fieri, facile conjici potest.

Quod si hoc aliquatenus verum est, tamen comparationes hujusmodi, inter res inanimatas et corpus animale, plus justo non sunt torquendæ. Etenim cum illarum proprietates faciles sint intellectu et interdum necessariae, utpote quæ iisdem armis quibus sunt confectæ item dirigi et refici debent, corporis contra munera prout vita pendeant penitus callere nequeat ullus, quin et quisque homo hæc eadem satis bene dirigit, duce natura, etiamsi qua ratione fiant nihil adhuc moratur, nec qualia sint omnino animadvertit. Sed hoc sanitate integra—quod siquando aliquid irruerit ægrotationis et ad medicum tandem ventum fuerit, eum saltem oportet quantum licet de corporis natura percepisse, cujus est vel ipsam naturam ordinare. Itaque ex indiciis morborum scire qua parte corpus maxime laboret, et quomodo optime sublevetur, utique debet; atqui nullum opus est vel eum naturæ arcana nimis curiose perscrutari, unde error

citius solet oriri quam utilitas. Quî enim ea percipere licet, quæ scientia absolutissima rerum unde proxime (pro nostris saltem facultatibus) pendent, neutiquam detexit? Siquidem vero adeo inepti sensus nostri certiores, quanto fallacior ratiocinatio—quanto adhuc perniciosior collatio extrinseca, nusquam quidem non suspiciosa, hic vero prorsus inhabilis. Veruntamen hujusmodi ratiocinatione et comparisone, omnes Medicinæ Theoriæ (quas vocant) semper innisæ sunt; quarum pleræque quæ hucusque in medium prodire multo magis cohibuere artem, neque mirabile, quam promovere.

Quin imo medicina cum reliquis artibus pari passu nunquam progressa est, ex hoc potissimum uti ego opinor, quoniam leges corporis animalis utcunque sibi propriæ proprium studium nunquam sibi vindicavere, quin semper in normas alienas nimis tenaciter sint collatæ. Cæterum quam inutiliter homines tali-

bus argutiis plerumque versantur hinc apparet, quod omnia fere quæ in medicina (unde semper intelligo curationem meram morborum) hactenus bene cesserunt, ex principiis longe diversis orta animadvertimus. Dum hæc subinde mecum revolvo, historiam medicinæ leviter conflare statui, quo uno quasi aspectu mutationes in hac arte omnes notabiliores considerentur.

Inter initia Artis Medicæ putandum fuit medicorum munere fungerentur ipsi sibi ægroti, contra mala sua quantum poterant contendentes; quibus et necessarii ministrarent, in consilium procul dubio habentes (sicut et hodie quodammodo solent) qualescunque hoc similive morbo sive ipsi unquam ægro-tassent, sive quemlibet ita implicatum cognovissent unquam, aut fama accepissent. Et profecto sic sitas res fuisse rescivimus inter Chaldæos Babyloniosque, quos ferunt olim ægrotantes in stratis suis per vias publicas eo

obtulisse, ut singuli viatores consilio, pro cuiusque sapientia, miseris opitularentur. Tum quod ad gentes vicinos, Persæ medicis ex suis diu carentes primum ex Egypto, deinceps e Græcia medicos sibi accesserunt : et quod ad Judæos quantula iis obtingebat medicinæ peritia, hanc maxima ex parte sibi arrogavere Sacerdotes et Levitæ, eodem nomine ac inter alios exteros tum Bramimæ tum Druidæ medicinam soli exercuere.

Verum apud Egyptios demum scientia (ut ita dicam) medicinalis initia accepit, quamvis et hic quoque religioni, seu potius superstitioni humillimæ, arcte alligata, miserrime, ut oportuit, compediebatur. Namque cum olim ediderat Tot quidam, inter eos celeberrimus, scripturas sex medicinales, harum mandatis ad amussim parere medici vel Pastophori obstricti sunt, hac lege ut siquando aliquis quantulumcunque defecerat, modo forte mors arriperet ægrotum ipse medicus capite illico

multatus esset. Qualis ergo fuit sub initio ars, talis in æternum perstare debuit, omni spe cultus felicitis radicitus evulsa. Sed inter eos, velut mos erat et apud veteres Græcos, quæstus suus unicuique medico, ab avis more hæredioli, demittebatur; quin etiam quisque, sive ex lege, sive propter eorum multitudinem, unicum curabat morbum, unde sperandum esset fore ut singuli, pro suo quisque malo, aliquid peritiæ paravisset, præter inauspicatum illud interdictum de quo supra posui. Quod ad eorum remedia, inter ea carminum incantamentorumque sat superque ubique scattet; tum a sanguinis missione parum abhorrebant, neque cremare moxam ad carnem exedendam nimia religio erat; ad hoc subinde purgandum esse corpus censebant, utique vomitu, propterea quod hoc tam æquabili cælo, nusquam oriri causas morbi præter quas ipsum sibi gigneret corpus, judicabant.

At in Græcia prisca, siquando quis morbo

laboravit, ad oracula deorum recta confugere solenne fuit, in quorum iracundiam nimirum (neque singulares) mala hujusmodi conferre semper solebant. Itaque in principio Apollini erat negotium tam ægrotantibus medendi, quam res futuras prædicendi; sed postquam hoc uberius perceptum fuerit officium, illud brevi repudiavit. Tantum vero artificium artificem diu desiderare non potuit: proinde quæstum sibi accepit Æsculapius, qui templa Medicinæ statuit, filiusque Apollinis exinde salutatur. Et pari ratione medicina apud eos, per longum ævum, heroïum, poetarum, sacerdotum in manibus erat; quorum, utique proximorum, præstigias Aristophanes Lucianusque argute proposuere.

His autem temporibus, ubi quemque morbum cujus natura haud ita manifeste patuit, a propria ira cujusdam numinis pendere censebant, nihil aliud agendum videbatur, quam ut ad hoc pacandum sese gnaviter accingerent.

Tales ergo perstabant usque dum primum affulsere Philosophi medicinæ doctrina et usus, hic inanis omnisque consilii expers, illa (si qua quidem esset) tenebris opacissimis undique obvoluta.

Atqui tum demum hominum ingenia usque adhuc horrida adeo et otiosa, satis superque expergefata, omnigenis rationibus, imo et ratiocinationibus quoque, mirifice versabantur.

Jam enim jaciebantur plurimum in medicina doctrinarum recentiorum fundamenta. Quippe ex Pythagoræ placitis de vi numerorum et de quatuor elementis, quin etiam ex Heracliti sententia de igne quodam creante et conservante, item ex doctrina quam tenebat Democritus de motibus atomorum, omnia fere quæ in medicina proposuerunt recentiores originem duxerunt: denique ab Acrone tunc temporis Agrigentino Sceptico, orti sunt et Empirici, tanti postea nominis. Verunta-

men curationem morborum tum primum quodammodo normatam accipimus, ubi Herodicus disciplinam suam gymnica instituit. Sub hac vero, quoniam nimirum sanos homines exercitatione certaminum sorpitari animadverterant, miseri ægroti, quasi satis ærumnis suis nondum vexati, omnibus hujusmodi cruciamentis objiciebantur; et quali fere successu nemini dubitare licet.

Herodicum excepit Hippocrates, Pater ut jure nuncupatur medicinæ, utpote qui hanc artem, altera parte ab empirice inepta, altera, a somniis philosophorum, primum vindicavit. Horum autem sententias adeo non fastidivit, ut ipse etiam doctrinam illam protulit celeberrimam de quatuor humoribus eorumque proprietatibus, de totidem corporis temperamentis, et de diebus criticis; omnia sane Pythagoræ placitis convenientia, cujus tunc temporis philosophia, una cum Heracliti, animos hominum participabat. Hippocratis vero max-

ima est laus, quod nulli rationi utcunque speciosæ tam fuit proclivis, eademque adeo obcæcatus, quin omni diligentia ad rem ipsam talem qualem præbuit natura considerandam, animum attenderet. Proinde pretiosissima ex ejus operibus ea sunt unde morbos cognoscere, eorumque casus portendere, docemur. Parum equidem de intima corporis fabrica, et de variarum ejus partium muneribus, percipiebat; porro remedia quibus utebatur pauca erant et simplicia. Cæterum viro illi illustri, disputationes de causis abditis morborum magis in curiositatem habitas quam in utilitatem videtur; quippe quæ vel neutiquam attingi sese concedant, vel parum admodum plerumque valeant ad ipsos morbos tollendos.

Haud ita multo post Hippocratis tempora, moram utique inauspicatam felici artis medicæ profectui opposuere Plato et Aristoteles, qui revera (ut inquit Bolingbroke) sinceræ scientiæ negotiis magis nocuerunt quam etiam

Gothorum et Vandalorum incursiones. Jam enim homines, a via ista recta tutaque qua modestus inceserat Hippocrates, maximeque dignus quem sequerentur, his ducibus, per itinera peregrina, tortuosa, lubrica, hallucinabantur, eorum judicio communi misere truncato, omnia se pulcherrime callere sibi persuadentes—nihil interim callentes. Hujus talis disciplinæ, animis hominum adeo blandientis, auctoritas per bis mille fere annos pollebat; quod inter ævum, quantus obsecro, et quam faustus fuisset medicinæ cultus, modo si hominibus permissum esset per planam semitam indagationis progredi, oculos minus attonitos ingeniosorum (quod aiunt) pompis gloriosis. Væ tali ingenio—væ maxime istiusmodi ingeniosis, quos penes fuit quod medicis, ineunte tandem seculo sexto decimo, eo pene fuit auspicandum, ubi ipso Hippocrate res est tam olim relicta. Modo autem Alexandria sedes facta est ubi medicina sedule coleba-

tur, ibique corpora Herophilo tum primum et Erasistrato dissecabantur. Sed iis adversatus, omnique de rebus medicis studio expiscanti, expendenti, ratiocinanti, Serapion Acronis scepticam restituit, scholæque empiricæ auctor fuit. Et eum audientes nihili faciebant ad sanandos morbos corporis proprietates percipisse, quid prosperam valetudinem, quidve adversam faceret, usu demum et experimentis nitentes. Neque quidem inficias est eundem tales cultores arte medica eo bene meruisse, quo habitus morborum, quæque eos vel juvent vel lædant, toto animo annotabant; disciplina profecto cum certior, tum multo utilior quam quævis nimis curiosæ de rebus fictis disputationes. Attamen hos inter et Dogmaticos lis iis temporibus orta est, vix hodie quidem pacata; atqui in utramque partem cadit invicem suspicio, ad palmam potius hosti extorquendam, quam propter studium veritatis, eos tam acriter semper certavisse.

Etenim revera nullus locus omnino est certaminis nisi verborum causa. Ecquid enim potuerit argumentatissimus unquam dogmaticus, citra usum et experientiam? Quin etiam empiricum, rationis adeo suspiciosum, sæpenu-mero secum disceptasse verisimile est, quando ipse rem forsán parum animadvertit. Postremo quid stultius—quid magis præpostere fieri unquam potuit, quam ut bellum mutuo ii indicèrent, jurgiumque inirent, quibus, tum ad utriusque utilitatem, tum ad subsidium ipsius artis, pace et vicissim adjumento opus erat?

Talis igitur comparebat medicinæ facies ubi Asclepiades emendationem ejus Romæ suscepit. Is vero in Hippocratis sententiam de corporis humoribus discedere fastidivit, ejusque de diebus criticis doctrinam crassa quadam facetia derisit. Veruntamen cum Democrito sentire de motu atomorum non perinde penituit, quin omnigena mala in meatus,

qua his iter fuit, quodammodo vitiatos semper contulit. Ægrotantes censuit sanandos cito, tuto et jucunde, licet suæ medicinæ jucunditas adeo non fuit perpetua, quod idcirco vix non tanquam carnifex a Celso exprobratur. Denique quod ad institutum ejus solenne curationis, id, quantum percipere licet, propemodum idem fuit ac olim Herodici, præter quod mitius aliquantulum, pro hominum vita tum dierum nonnihil cultiore.

Et pari consilio Themison postea Thessalusque disciplinam methodicam condidere, ut quæ methodum simplicem et compendiarium ad morbos cognoscendos curandosque præberet. Quippe in unoquoque morbo, corpus aut nimis strictum esset aut nimis laxum oportuit, vel denique (quod næ subtilius quam facile intellectu) nimis in utramque partem inclinatum: humorum interim proprietatibus ne minima quidem ex parte consultum est.

Hi autem quemadmodum disputare et medicinam facere solebant, Coelius Aurelianus per se potissimum docet; quin is insuper eam formam curationis depingit, qua varia remedium pericula, siquando morbus pertinacior esset, methodica serie producebantur, dummodo corpus sustinere morbum simul et medelam non recusavit. Quod si nullius in verba magistri jurare solebat, neque in res novas nimis gestiens sed summa passim modestia, Celsum prorsus silere nequeo, qui annos aliquot ante Aurelianium floruit. Is enim libello quem eximia prudentia et venustate conflavit omnia in prisca medicina utilia fere complexus est, opes omnium sedulo libavit, nugas respuit, et sive Hippocratem sequi sive Asclepiadem nihil moratus est, prout utrius consilium plausibilius videretur et meliore fide. At eo tempore, quod quidem jam olim mos fuerat, artem medicam tripartito distribuere auctores solebant, quandoquidem una parte ali-

mentis, altera medicamentis, tertia manu erat pugnandum. Itaque de victus ratione, tam integræ valetudini idonea quam quassatæ, more veterum Celsus omnia sigillatim et summa cura exposuit; ad hoc præcepta ejus quod ad chirurgiam vel nostris temporibus minime sunt contemnenda; cæterum medicamina rarius intro in corpus mittenda quam extrinsecus admovenda censuit, sed hac in parte hodiernos minus quam alias adjuvat.

Neque ita multo post Aretæus, alter quasi Hippocrates, in medicinæ theatrum prodiit. Is inter medicos pneumaticos, novum genus nimirum methodicorum, cui hic solum fere constat decus, annumeratur. Tamen ut philosophiam ejus missam faciamus, ad usum artis Aretæus auctor prudentissimus nunc etiam dierum habetur et semper habebitur, quippe quem judicio et summa diligentia, quod ad morbos ipsos, nemo hominum unquam superavit; et eo quidem nomine, hunc

Hippocrati inter veteres, inter recentes Sydenhamo comparare licet. Neque silendum est Aretæum vesicatoria ex cantharide in arte medica primum usurpasse.

Huic æqualis, quantum conjectura assequamur, erat Galenus, cujus brevi adeo pollebat in rebus medicis auctoritas, ut eum vel citare absque summa observantia per plura secula nefandum esset. Tunc vero (ut temporibus illis) systematum plena erant omnia, sed Galenus se nullius sectæ omnino professus est. Modo inter eum et Hippocratem de quatuor rerum elementis convenit, item de quatuor corporis humoribus, et de quatuor temperamentis hominum; ad hoc Galenus medicamenta etiam pro eorum quatuor proprietatibus partitus est. Quin et indicia morborum prout in functiones animales, vitales, naturales adoriantur (digestio hodie receptissima) ordinavit, necnon pro eodem ordine, morbos

aliud ab alio dignoscere et de eorum exitu augurare docuit.

Postremo vix non omnia quaecunque in medicina versantur cumulate pertractavit, quæ licet paucos quidem reor nostris temporibus inveniendos qui tota perlegerint, tamen minime est negandum quin recentiores his rebus haud parum amplificaverit. Quod ortum est a Galeno mali, eo ortum est, quod homines eum rem tandem absolutam dedisse crediderunt, unde spes omnis, omne studium ultra progrediendi ex toto perierat; ideoque per longum post ævum, nihil fere in medicina prolatum est, præter commentaria insulsa in ejus et Aristotelis (summa semper apud eum gratia) argumenta.

Paulo post Galeni tempora Græcia denuo artium domicilium facta est, verum hujusce ætatis scriptores vix aliquid edidere novi, nisi quod fortasse Paulus Ægineta arti chirurgicæ satis feliciter operam impertivit.

Jam enim in medicinæ profectu hiatus tristis, turpis, inutilis, octo secula penitus devoravit, de quo tam diuturno ævo vix aliud quicquam dici potest quam quod nihil est dicendum. Sed interea rerum publicarum fortuna, per varios casus, Arabicis medicinæ cultum tandem assignavit. Quippe cum Hippocratis, Aristotelis Galenique opera ex deflagratione bibliothecæ Alexandrinæ correpta, in eorum potestatem traderentur, his tantis usi ducibus, ad artis salutiferæ studium sese accommodavere ; et siquid in rem ipsi junioriores unquam contulere, id, his insignibus Antiquitatis monumentis protinus insertum et commistum est. Et in hoc operis Rhazes, Avicenna, Albucasis primas partes sustinebant. Cæterum Arabicis jure permittendum est quod artis chemicæ incunabula jam foverent ; tum quod medicamina quædam leniora quamquæ antehac noverant medici indicarent, et syrupo vice mellis tum primum uterentur :

Denique morbos aliquos, variolas nimirum et morbillos, apud Arabicos demum scriptores offendimus, a quibus profecto tam habitus morborum quam curationes satis sagaciter ponuntur. Et ita aliquamdiu, procul a pristina sede, res medicæ agebantur. Brevi autem Europa bellis sacris tota fervescit, in quæ quantacunque insania homines rapiebantur (cum enim parum propitia semper scientiæ bella) tamen his plane concedendum est, quod literæ bonæque omnes artes nobis tandem peregre redierint. Ad hoc charta paulo post primum manufacta, arsque typographica excogitata studiis hujusmodi facultates alasque dedere.

His autem temporibus Judæi potissimum medicinam exercebant, ad quam quidem satis apte instructi videntur; utpote qui per cunctas terras divagabant, et linguam Arabicam callebant, in qua omnia de hac arte præcepta scripta fuerunt: quin imo revera accidit quod

veste Arabica indutos Hippocratem Galenum-
que recentiores primum intuebantur. Verun-
tamen adversus Judæos, sacerdotes soli jus
suum antiquum in quæstum medicum asseru-
erunt; sed sive ibi non juxta valuerunt atque
olim, quod ad sanandos morbos, incantamenta
et deprecationes sacerdotales, sive paululum
nasutiores homines evaserunt, horum e mani-
bus paulatim tota elapsa est, ne nimium esset
iisdem tam vitio corporis quam labi animæ
consulere.

Primordia denique seculi sextidecimi orbi
affulserunt, et rerum gestarum memoriâ ful-
gent adhuc et semper fulgebunt: neque dum
adeo laborabant Restoratores (quales vocantur)
in bona studia recuperanda, fieri potuit quin
medicina quoque faustioribus avibus progre-
deretur. Etenim Græciæ incolæ qui, regno
orientali perduto, in Italiam profugerunt, mo-
numenta librorum veterum medicorum secum
attulerunt, frivolis Arabicorum intaminata;

in quæ (auribus hominum brevi arrectis) prælectiones primum scholæ Salernitanæ, mox aliis Europæis, publice proferebantur. Quin etiam Collegia Medicorum cum Lenacer Londino, tum alii aliis locis, per id tempus moliebantur.

Verum postquam anatomia jampridem in Italia culta erat, Bruxillæ tandem Vesalius quanti fuerant de hac re Galeni errores satis libere docere aggrediebatur. Sic primum laccessita summa hujus auctoritas et jam nonnihil fluxa, mox deprehenso ductu thoracico sanguinisque circuitu demonstrato, magis ac magis indies lababat. Ad hoc tum simul morbus Veneris omnes terras misere vastabat, qui, cum remedia omnia antiqua diu et penitus eluserat, argento vivo demum, quo usus est audacter Paracelsus, cessit. En quantam invicem et quam lætam victoriam de Galenicis Chemici quoque reportavere; modo etiam ars chemica rem plausibilem tandem spectans,

cuique homines ingenui majore honestate animos intenderent, existimationem atque studium quibus est digna, inter bonas artes, tum primum sibi vindicavit. Itaque deinceps (nimirum ut mos est hominibus, siquando quid bene gesserunt, ubi desistendum est plane nesciunt) Chemia rerum humanarum sola potiebatur; quæ quoniam alia tam pulchre detegebat, ad vivi corporis munia enodanda haud minus valere debuit.

Quod si verisimiliora narrabant Chemici quam docuit olim Galenus, perperam tamen, ut plurimum, de his rebus disputabant, quam acie hercle minime vulgari sive acidum sive alkali, prout laboraret corpus, strenue increpabant. Ad summum, horum quoque, quemadmodum et antea Galenicorum, de statu humorum corporis totus sermo erat. Attamen utrique simul parti certamina mox indixere Iatro-mathematici, duce Descartes, qui fluidas corporis partes floccifaciebant, viribus

modo solidarum quam curiosissime perpensis, utpote in quas, aliquo in modo offensas, malum corporis omnigenum referri deberet: si quidem vero ex his peritissimi, et in rebus utique simplicibus, numeris rationem ineuntes, centuriatim aliquando, et si placet milliriaticum sibi invicem dissensere, scrupulum merito injecere, an hujusmodi computationes (esto enim ipsa enunciatio satis stabilis) arti medicæ mag-nopere sint profuturæ. Hæc dum utrinque chemice mechaniceque agitentur, Sydenhamus, Hippocrates nostras, exortus est. Illustris ille, exemplaris hujus illustrissimi sector, adeo in usum et observationem nitebatur, ut siquid sibi ipse (ut fit) subinde fingeret, placita omnia tam veterum quam recentiorum etiam nimis fortasse fastidivit. Diligentius autem morbos considerare, aptius judicare, tempestius curare, nemo hominum unquam potuit; næ summa semper medicorum negotia: tum quod ad systemata, siqui-

bus sane opus est, quodvis tale adeo solute homini semper adhæsurum censebat, ut si quando res postularet facile et statim rejiceretur.

Jam inde post initum seculum sextum decimum cum turba auctorum de rebus medicis ingens est, quippe cujus pecoris plures quam triginta millia (quorum perpauca ante hoc tempus scripserunt) annumeravit Hallerus, plerorumque opera temporaria fuerunt, eoque magis silenda quò continuo ad Stahlianum et Hoffmannum perveniam, qui demum aliquid novi in medicina protulere.

Postquam enim scientiæ chemicæ totum corpus denuo formavit, et non sine fructu, Stahlius aliquid tale in medicina quoque moliebatur. Et tum primum probe animadvertit sum est corpus animale legibus peculiaribus et sibi propriis utique obtemperare, ideoque functiones ejus ex reliquarum rerum habitu et regulis perparce esse judicandas. Itaque

repudiatis omnibus de hac re hactenus con-
jectis, novam sibi Stahlius contexuit doctri-
nam, cujus hoc fundamentum, hæc medulla
fuit, eam animam quæ corpori inerat pro sa-
lute ejus assidue excubare, ejusque omnia ne-
gotia certo consilio regere et ordinare, penes
se nimirum officia ejus omnia tenentem.

Neque longe secus Helmontius de Archæi
sui facultatibus jam hallucinatus erat. Quod
recte judicavit Stahlius quo leges rerum ina-
nimatarum, quod ad munera corporis viventis
attinet, ineptas habuit, abunde patet ; verum
is tandem nihil præter verbum præbuit quo
proprietas ista designaretur, ratione ejus et
normis neutiquam expositis : præterea artem
medicam non misere inopem reddere talis doc-
trina non potuit, et medicos a remediis opti-
mis (quod revera accidit) pertinaciter aversa-
tos. At interibi Hoffmannus disciplinam ve-
terem methodicam (quod quidem frustra co-
nati erant antea Alpini Baglivique) modo ali-

qua ex parte temperatam, redintegravit ; et hæc profecto ima sedes est nostræ ut hodie extat scientiæ. Quod si denuo solidorum tantum corporis ratio habebatur, solidum tum demum duplex esse oportuit ; siquidem quod commune erat sive mortuo sive vigente corpore, id simplex, quod vero viventi proprium, id vivum solidum vocabant, et ex posteriore, prout male se habeat, quemlibet fere morbum pendere putabant. Huic disciplinæ assensores *Solidistæ*, *Stahlianæ* contra *Animistæ* nuncupantur. Dum autem hæc aguntur, Boerhaavius omnes in medicina systematum conditores tam veteres quam recentes summo studio evolvit ; tum excerpendo pro utriusque meritis, purgando, conciliando, conjungendo, molem medicinæ tandem fabricavit, quæ diu neque immerito, ut temporibus illis, scholas tenebat. Quod ad explicationes denique morborum quas ille posuit, sufficiat prædicare

eum ad corporis humores atque solidum simplex nimium semper spectasse.

Istiusmodi ubique fere vigentibus doctrinis, placita quibus modo innixus est Hoffmannus jam primum Edinburgi proposita fuere; quorum inter patrones ascribitur inclytum et Culleni nomen, qui cum tot et tanta in medicinam contulit beneficia, non minimum erat quod eam rem summa sua auctoritate adjuvaret. Postremo sententiæ Stahlii et Hoffmanni in meliorem ordinem redactæ, variisque colligatæ et excultæ modis, omnium hodie sunt receptissimæ, plausibilioremque doctrinam de his rebus certe præbent quam hucusque homines unquam sunt potiti. Satius enim proculdubio est viribus motricibus corporis quam humoribus morbos vitio dare; quod sicubi id ad rem absolvendam parum valeat, continuo ad vim medicatricem naturæ confugiatur, cui scrupulum omnem tandem concedamus.

Nihilominus tamen confitendum est, nullo

ævo defuisse unquam systema, cui medicum perinde credidere ac nos hodie huicce invicem credimus ; quod fortasse ideo solum optimum est quoniam nobis proximum, mox pariter ac alia repudiandum. Itaque disputationibus hujusmodi caute admodum fides est adhibenda, et bene est quod talibus res ipsa parum omnino eget. Ut ut enim prius ratiocinemur, ubi ad curationem ventum est, experientiæ utique erit parendum ; sub omni-que omnium sententia morbos ex signis suis noverunt semper medici, et his semper remediis usi sunt et utentur quæcunque usus ipse comprobaverit. Quod Pythagoras, Hippocrates, Aristoteles, Galenus, quod Democritus, Asclepiades, Themison, quod Chemicis et Mathematicis, quod denique Stahlius Hoffmannusque sibi imaginati sunt (licet hominibus aliquatenus ratiocinari necesse est) hæc omnia minus certa semper sunt habenda ; sin etiam certa, fortasse rei ipsi parum profutura. Pru-

dentis igitur erit tum demum imaginatione versari, cum saltem nihil detrimenti afferre poterit; et imprimis cavere nequando propria morborum negotia, propter systematum (quod aiunt) illecebras, minima ex parte prætermittat.

FINIS.

gentis igitur erit tum demum imaginatione
versari, cum saltem nihil detrimenti afferre
poterit; et imprimis cavere nequando pro-
pria morborum negotia, propter systematum
(quod sunt) illecebras, minima ex parte pre-

termittat.

FINE.

DISPUTATIO MEDICA

ORDINIS DE

HEMORRHAGIA UTERINA

COMPLETUM